



BOSNIA AND HERZEGOVINA  
MINISTRY OF FINANCE  
AND TREASURY

Broj: 05-02-2-4285-1 /24  
Sarajevo, 25.06.2024. godine

Na osnovu člana 11. Zakona o finansiranju institucija Bosne i Hercegovine ("Službeni glasnik BiH", br. 61/04, 49/09, 42/12, 87/12, 32/13 i 38/22), ministar finansija i trezora Bosne i Hercegovine, donosi

**I N S T R U K C I J U**  
**O PRIVREMENOM FINANSIRANJU INSTITUCIJA BOSNE I HERCEGOVINE ZA**  
**PERIOD JULI - SEPTEMBAR 2024. GODINE**

**Član 1.**  
**(Predmet Instrukcije)**

Ovom Instrukcijom utvrđuje se iznos sredstava za privremeno finansiranje u periodu juli - septembar 2024. godine za izvršavanje nadležnosti institucija Bosne i Hercegovine, regulira se raspored rashoda po budžetskim korisnicima, način realizacije višegodišnjih projekata i programa posebne namjene, te nadležnost za realiziranje Instrukcije.

**Član 2.**  
**(Visina sredstava za privremeno finansiranje)**

- (1) Privremeno finansiranje institucija Bosne i Hercegovine za period iz člana 1. ove Instrukcije utvrđuje se na osnovu Zakona o budžetu institucija Bosne i Hercegovine i međunarodnih obaveza Bosne i Hercegovine za 2023. godinu („Službeni glasnik BiH“, broj 22/23).
- (2) Za finansiranje institucija Bosne i Hercegovine u periodu juli - septembar 2024. godine odobravaju se sredstva u iznosu do 328.850.000 KM, što predstavlja 1/4 sredstava odobrenih za finansiranje institucija Bosne i Hercegovine u skladu sa Zakonom o budžetu institucija Bosne i Hercegovine i međunarodnih obaveza Bosne i Hercegovine za 2023. godinu.

**Član 3.**  
**(Raspored rashoda po budžetskim korisnicima)**

- (1) Raspored rashoda po budžetskim korisnicima za period iz člana 2. ove Instrukcije za tekuće rashode vršice se na osnovu budžeta korisnika utvrđenih u Zakonu o budžetu institucija Bosne i Hercegovine i međunarodnih obaveza Bosne i Hercegovine za 2023. godinu u iznosima kojima se omogućava obavljanje aktivnosti za zakonom utvrđene nadležnosti budžetskih korisnika. Ministarstvo finansija i trezora Bosne i Hercegovine (u daljnjem tekstu: Ministarstvo) usaglašava sa budžetskim korisnicima operativne planove potrošnje za period važenja ove Instrukcije.
- (2) Raspored rashoda na stavci Direktni transferi sa Jedinственog računa trezora – stavka 9999- podstavka 1 utvrđenih Zakonom o budžetu institucija Bosne i Hercegovine i međunarodnih

obaveza Bosne i Hercegovine za 2023. godinu, vršit će se u skladu sa dospijućem obaveza po pojedinim stavkama.

- (3) U skladu sa članom 11. stav (6) Zakon o finansiranju institucija Bosne i Hercegovine, ukoliko Parlamentarna skupština Bosne i Hercegovine do 31. marta tekuće godine ne usvoji Zakon o budžetu institucija Bosne i Hercegovine i međunarodnih obaveza Bosne i Hercegovine, realizovat će se samo tekući rashodi neophodni za funkcionisanje institucija Bosne i Hercegovine, u okviru iznosa rashoda propisanih članom 2. stav (2) ovog Zakona.
- (4) Korištenje tekuće rezerve iz člana 3. tabela 3. stavka 9999-2, podstavka 1 - Tekuća rezerva, utvrđene Zakonom o budžetu institucija Bosne i Hercegovine i međunarodnih obaveza Bosne i Hercegovine za 2023. godinu vršit će se u skladu sa članom 17. Zakona o finansiranju institucija Bosne i Hercegovine, a najviše do 1/4 tekuće rezerve iz člana 3. tabela 3. stavka 9999-2, podstavka 1. Sredstva tekuće rezerve se u skladu sa članom 11. stav (6) Zakona o finansiranju institucija Bosne i Hercegovine mogu koristiti isključivo za finansiranje tekućih rashoda neophodnih za funkcionisanje institucija Bosne i Hercegovine.

#### **Član 4.**

##### **(Višegodišnji projekti i programi posebne namjene)**

Nastavak realizacije višegodišnjih projekata koji su usvojeni u budžetima prethodnih godina, kao i programa posebnih namjena vršit će se iz sredstava koja su prenesena u skladu sa članom 14. Zakona o finansiranju institucija Bosne i Hercegovine, odnosno osigurana namjenskim donacijama i drugim namjenskim sredstvima.

#### **Član 5.**

##### **(Sačinjavanje operativnih/dinamičkih planova)**

- (1) Svi su budžetski korisnici dužni Ministarstvu najkasnije do 15.7.2024. godine podnijeti prijedloge operativnih/dinamičkih planova za juli, avgust i septembar 2024. godine za tekuće rashode (bez programa posebnih namjena finansiranih iz namjenskih sredstava i kapitalnih izdataka). Ukupan iznos operativnih budžeta za treći kvartal 2024. godine ne može biti veći od 1/4 sredstava usvojenih u Zakonu o budžetu institucija BiH i međunarodnih obaveza BiH za 2023. godinu.
- (2) Obavezuju se korisnici da rasporede rashode po prioritetima izvršenja, s tim da će Ministarstvo, s obzirom na ograničenost priliva prihoda, izvršiti raspored rashoda u skladu sa prioritetima izvršenja definiranim u članu 18. Zakona o finansiranju institucija Bosne i Hercegovine. Budžetski korisnici ne mogu započinjati nove ili proširene programe i aktivnosti dok se ne odobre u Budžetu institucija Bosne i Hercegovine za 2024. godinu.
- (3) Dinamičke planove (tabele) korisnici će popuniti u skladu sa „Instrukcijom o načinu izrade operativnih planova za izvršenje Budžeta institucija Bosne i Hercegovine za 2023. godinu i o načinu praćenja programa posebnih namjena“ koja je objavljena na internet stranici Ministarstva [www.mft.gov.ba](http://www.mft.gov.ba).
- (4) Dinamičke planove za Programe posebnih namjena finansiranih iz sredstava donacija i namjenskih sredstava, potrebno je posebno iskazivati i rashode rasporediti po ekonomskim kategorijama, koje će budžetski korisnici dostavljati uz zahtjeve za alokaciju nakon ostvarenih priliva sredstava u toku 2024. godine. U skladu sa članom 14. Zakona o finansiranju, nerealizirani programi posebnih namjena finansirani iz namjenskih sredstava i nerealizirana sredstva na ime višegodišnjih kapitalnih projekata prenesenih u 2024. godinu, finansirat će se do iznosa prenesenih, a neutrošenih namjenskih sredstava.
- (5) Izvršenje Budžeta institucija Bosne i Hercegovine u dijelu rashoda operativno će se usklađivati s dinamikom ostvarenja prihoda predviđenih Budžetom.

- (6) Obavezuju se budžetski korisnici da uz zahtjev dostave elektronsku verziju sa skeniranim potpisanim i ovjerenim tabelama operativnog plana za period juli - septembar 2024. godine i obrazloženjima istog.

**Član 6.**  
**(Nadležnost za realizaciju)**

Za realizaciju ove Instrukcije zadužuje se Ministarstvo i institucije koje se finansiraju iz budžeta, u skladu sa odredbama i procedurama utvrđenim u Zakonu o budžetu institucija Bosne i Hercegovine i međunarodnih obaveza Bosne i Hercegovine za 2023. godinu i Zakonu o finansiranju institucija Bosne i Hercegovine.

**Član 7.**  
**(Stupanje na snagu)**

Instrukcija stupa na snagu danom donošenja i primjenjuje se počev od 1.7.2024. godine, a sastavni dio iste su tabele operativnih/dinamičkih planova budžetskih korisnika za period juli - septembar 2024. godine (Tabele 1-4).

**MINISTAR**  
**Dr. Srdan Amidžić**

